

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHANG LIH KANG (TANJUNG MALIM)**

**TARIKH : 16 JULAI 2019 (SELASA)**

**SOALAN NO. 31**

minta **PERDANA MENTERI** menyatakan sama ada Kerajaan bersedia untuk menggubal undang-undang untuk menjaga keharmonian antara kaum dan agama, seperti Akta Keharmonian Sosial.

**JAWAPAN : [ YB SENATOR WAYTHA MOORTHY A/L PONNUSAMY ],  
MENTERI DI JABATAN PERDANA MENTERI**

Yang di-Pertua,

Adalah menjadi tanggungjawab dan kewajipan sesebuah Kerajaan yang berdaulat untuk menjamin keharmonian rakyatnya. Malaysia sebagai sebuah negara dengan masyarakatnya yang terdiri daripada kepelbagaian kaum, agama, bahasa dan budaya tidak terlepas berhadapan dengan insiden-insiden yang boleh menggugat perpaduan dan keharmonian negara.

Namun, kerajaan tidak berhasrat untuk menggubal suatu undang-undang baharu sebagaimana yang dicadangkan YB Tanjung Malim. Kerajaan hari ini telah mempunyai undang-undang yang sedia ada seperti Kanun Keseksan, Akta Hasutan 1948, Akta Multimedia dan Komunikasi 1998 serta Akta Suruhanjaya Hak Asasi Manusia 1999 untuk menjaga keharmonian antara kaum dan agama. Justeru, mereka yang sengaja memecahbelahkan perpaduan dan keharmonian negara akan didakwa di bawah undang-undang yang sedang berkuat kuasa.

## **NO SOALAN : 31**

Ketiadaan undang-undang spesifik berhubung dengan keharmonian antara kaum dan agama ketika ini tidaklah bermakna bahawa usaha-usaha memupuk perpaduan dan keharmonian masyarakat terus diabaikan, sebaliknya, usaha menyatupadukan kaum di negara ini akan dan sedang terus dipergiatkan lagi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI DR. HAJI ISMAIL BIN HAJI ABD.  
MUTTALIB [MARAN]**

**TARIKH : 16 JULAI 2019 (SELASA)**

**SOALAN NO. 32**

Minta **MENTERI HAL EHWAL EKONOMI** menyatakan Dasar Ekonomi Baru (DEB) yang dibentuk selepas 13 Mei 1969 adalah bagi mengimbangi ekonomi Bumiputera dan bukan Bumiputera. Setakat ini apakah pencapaian dasar ini dan apakah peratus beza tara pemilikan (aset/harta) Bumiputera dan bukan Bumiputera.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Dasar Ekonomi Baru (DEB) memberi penekanan kepada serampang dua mata iaitu membasmi kemiskinan tanpa mengira kaum dan menyusun semula masyarakat bagi merapatkan jurang ekonomi dalam kalangan rakyat Malaysia telah tamat pada tahun 1990. Kerajaan melihat bahawa pelaksanaan dasar dan semangat DEB masih kekal relevan malahan akan terus diperkasakan melalui dasar-dasar baharu yang lebih strategik bersesuaian dengan keperluan semasa. Kerajaan juga berpendirian bahawa masih terdapat ruang yang boleh ditambah baik terutama melibatkan kepentingan Bumiputera serta kaum-kaum yang lain di Malaysia supaya proses pelaksanaannya lebih telus dan bertanggungjawab.

2. Untuk makluman Ahli Yang Berhormat, pencapaian dasar DEB boleh dilihat melalui indikator-indikator sosioekonomi Bumiputera berikut:

- i. insiden kemiskinan Bumiputera berkurangan daripada 64.8 peratus pada tahun 1970 kepada 23.0 peratus pada tahun 1989. Sehingga tahun 2016, insiden kemiskinan Bumiputera telah menurun kepada 0.5 peratus;
- ii. purata pendapatan isi rumah Bumiputera telah meningkat daripada RM264 pada tahun 1970 kepada RM1,169 pada tahun 1989 dan terus meningkat kepada RM6,267 pada tahun 2016;
- iii. pemilikan ekuiti Bumiputera dalam sektor korporat telah meningkat daripada 2.4 peratus pada tahun 1970 kepada 19.3 peratus pada tahun 1990 bagi nilai tara; Manakala, pemilikan ekuiti Bumiputera dalam sektor korporat terus meningkat pada tahun 2011 kepada 23.4 peratus; dan

- iv. peratus profesional berdaftar Bumiputera juga telah meningkat daripada 11.3 peratus pada tahun 1980 kepada 27.1 peratus pada tahun 1990. Peratusan tersebut semakin bertambah kepada 39.9 peratus pada tahun 2017.

3. Untuk makluman Ahli Yang Berhormat, berdasarkan kepada transaksi yang telah direkodkan oleh Pusat Maklumat Harta Tanah Negara (NAPIC) bagi tahun 2018. Walau bagaimanapun, data ini tidak menggambarkan pemilikan jumlah pemilikan sebenar kaum-kaum di negara ini. Maklumat adalah seperti berikut:

- i. peratus transaksi pemilikan kediaman Bumiputera dalam pasaran primer pada tahun 2018 adalah 46.5 peratus (nilai bersamaan RM6.20 bilion) berbanding bukan Bumiputera sebanyak 49.1 peratus (nilai bersamaan RM6.56 bilion);
- ii. peratus transaksi Bumiputera dalam jenis pemilikan komersil hanyalah 8.2 peratus (nilai bersamaan RM0.16 bilion) berbanding bukan Bumiputera iaitu 42.6 peratus (nilai bersamaan RM0.85 bilion);
- iii. peratus transaksi pemilikan premis perindustrian Bumiputera dalam pasaran primer pada tahun 2018 adalah 1.2 peratus (nilai bersamaan RM8.43 juta) berbanding bukan Bumiputera sebanyak 14.0 peratus (nilai bersamaan RM99.65 juta).